

HUBUNGI SKUAD KUALA LANGAT / SEPANG:
NURUL FIRDAUS KHAIRI - 019-6680920/ 019-3371066

KUALA LANGAT / SEPANG

Bengkel khas bantu pelajar IKBN jalani latihan industri



Peserta bengkel khas berkenaan bersama pengurusan IKBN.

BANTING – Pelajar Diploma Teknologi Hiasan Dalamana, Diploma Industri Product Design, Sijil Pengarangan Multimedia dan Sijil Terapi Sukan menyerahkan deklarasi persediaan menjalani latihan industri kepada pengurusan Institut Kemahiran Belia Negara (IKBN) Kuala Langat Banting, baru-baru ini.

Penyerahan itu dibuat kepada Timbalan Pengarah Hal Ehwal Pelajar, Abdul Rahim Md.Shariff mewakili Pengarah, Megat Hussain Megat Jaafar pada bengkel khas persediaan menjalani latihan industri.

Bengkel yang dikendali-

kan Presiden Alumni Institut Kemahiran Tinggi Belia Negara (IKTBN) dan IKBN, Samsudin Oli Mohamed itu bertujuan mendedahkan pelajar dengan persediaan ke latihan industri.

Abd Rahim berkata, program anjuran Persatuan Alumni IKTBN/IKBN dengan kerjasama Pusat Pengajian Lanjutan Universiti Utara Malaysia (UUM) itu turut memberi pendedahan mengenai peluang pengajian lanjutan ke peringkat ijazah.

"Malah, program ini juga dapat meningkatkan kebolehpasaran graduan.

"Kerjasama dengan majikan perlu supaya kehadiran pelajar ini bukan sekadar menjalani latihan, malahan mungkin boleh diserap sebagai pekerja tetap atau membantu mereka memulakan perniagaan," katanya.

Menurutnya, kursus itu membantu pelajar memberikan yang terbaik kepada industri atau majikan tempat mereka menjalani latihan nanti.

"Ilmu dan modul yang dipelajari telah diberikan tenaga pengajar dan kini tiba masa mereka berkongsi dengan wakil majikan untuk lebih jelas lagi," katanya.

Berhimpun setelah 26 tahun terpisah

SIJANGKANG - Seramai 50 bekas murid lelaki Sekolah Kebangsaan (SK) Sijangkang sesi 1985 hingga 1990 dihimpunkan buat julung kalinya setelah 26 tahun terpisah.

Pengarah program, Azmi Selamat berkata, susulan kejayaan perhimpunan itu, timbul cadangan mengadakan perhimpunan besar-besaran pada hujung tahun ini.

"Idea nak buat *mega reunion* melibatkan bekas murid lelaki dan perempuan timbul hasil pertemuan ini. Masing-masing teringin nak jumpa kawan-kawan lama.

"Mungkin ada antara kami pernah terserempak tapi tak perasan. Jadi, *mega reunion* ni akan jadi titik tolak untuk mengeratkan semula hubungan satu sama lain," katanya pada majlis perhimpunan semula itu

di Taman Rekreasi Paya Bakau di Kampung Sijangkang, di sini.

Menurutnya, bukan sesuatu yang mudah untuk menghimpunkan semula rakan-rakan lama, namun usaha itu berjaya hasil dorongan satu sama lain.

"Apa yang kita buat ni, semata-mata nak rapatkan ikatan persahabatan dan memanjangkan lagi silaturahmi," katanya.

Azmi berkata, mereka juga bakal mengadakan program ziarah bekas guru SK Sijangkang yang uzur dan menyalurkan sumbangan hasil kutipan mereka.

"Pada Aidilfitri nanti, satu jamuan khas untuk bekas murid akan diadakan bagi meraikan hubungan baik kami ketika alam persekolahan dulu," katanya.



Sebahagian bekas murid SK Sijangkang yang dapat dihimpunkan buat julung kalinya.

